

ORATIO  
IN FUNERE  
JOSEPHI MARIAE  
THOMASII  
S. R. E.  
CARDINALIS

Ex Ord. Cleric. Reg.

*HABITA PATAVII*

In Templo ejusdem Ord.

A JACOBO GIACOMETTI.



PATAVII, M. DCC. XIII.

Typis Seminarii. *Superiorum Permissu.*

THE

LIBRARY

OF THE

UNIVERSITY

OF TORONTO

177

177

177

177

# CLEMENTI XI.

## PONT. OPT. MAX.



*B* argumenti amplitudine;  
*BEATISSIME*  
*PATER*, longe abest  
*ratio hac; aberit fortasse longe, quacun-*  
*que expendatur iuste ad illud: nihilo-*  
*minus & ubi dicendi facultas minor sit*

A 2 co,

eo, qui laudatur, rem bene se habere  
ait D. Gregorius Nazianzenus in fu-  
nebri Encomio\*, quo ita ipse eloquentis-  
simum quenque superavit, ut eloquen-  
tiam omnem superabat is, cujus de laudi-  
bus agebatur: hoc enim declarat, inquit,  
κρείττον ἢ καὶ λόγῳ διώκων, ὅτι τὸν ἀφηνεΐσθαι -  
Ut autem producerem **SANCTI-  
TATI TUÆ** dicatam, prater  
autoritatem verendam ejus, a quo vo-  
luntas pendet nostra, cujus incredibili hu-  
manitate, ac liberalitate fovemur; cau-  
sa non hortata solum est, sed impulit  
etiam. Quid enim, **PONTIFEX  
SUMME**, tam proprie tuum; quid  
e sanctitate, & sapientia tua magis;  
ad famam perennem Pontificatus tui mo-  
numentum quodnam illustrius, quam  
**THOMASIUS**? par votis Ecclesia  
universa, cum Cardinalis a Te dictus;  
Ecclesia. universa jactura habitus, cum  
mortuus; letitia pro illo, mœstitia pro il-  
lo pu-

lo publica , & inusitata . Res tua cele-  
 brantur , maxima omnes ; profecta  
 omnes a gravitate , providentia , men-  
 te , virtute divina , qua Christianum  
 Populum moderaris , & ut diu modere-  
 re , obsecramus Deum Immortalem , qui  
 Te Elegit : profecto inter facta ingentia  
 tua THOMASIVS erit , a Te amo-  
 re , a Te honore excellenter ornatus ,  
 illic erectus , unde , quantus erat , &  
 quanta bonitate , ac doctrina , toti esset  
 Christiana rei . Nec vero fas mihi du-  
 itare , quin hoc tenuiter elucubratum  
 tenni , & SANCTITATI  
 TUÆ oblatum , qui ad disciplinas  
 suasque gravissimas , Latina facundia ;  
 & politioris elegantia laude flores , quàm  
 in pulcherrime aetate nostra ; excipias  
 enigne tamen , saltem propter sanctita-  
 tem hominis , quem habui in animo com-  
 mendare stylo simplici , fucò nullo quasi-  
 , procul ascititiis , fictisque summotis ;

\* ibid.

ad qua confugere tantum solent, quibus  
propria res, quas pradicent, veraque  
desunt; ratus & hic decere maxime\*,  
ὅτι μὴ πλάσσειν, μηδὲ μύθοις, αἰνῶς δὲ τοῖς  
ᾠδαῖς καὶ λαοῖς ζῆσαι, καὶ ὅτι πολλοὶ μέρτερες.  
CARDINALIS integerrimi, & sa-  
pientissimi vitam, vita testes vivos,  
presentesque recito coram SANCTI-  
TATE TUA, teste maximo Virtu-  
tum ejus: Has unas infero augusto Sa-  
crario Tuo cum religione animi mei;  
& osculis, qua procumbens in genua af-  
figo Pedibus

BEATITUDINIS TUÆ

Patavii Kal. Jun. ∞ DCCXIII

Servus humillimus  
Jacobus Giacometti.

ORA.

## ORATIO

**Q**uem ingenti gratulatione, & lætitia Urbis effusa, nuper in Cardinalium numerum adscriptum vidimus, qui Romæ fuimus, probitatis exquisitæ fama nobilem, magnum, religiosissimi Patres, disciplinæ vestræ alumnum, lumenque clarissimum Ordinis vestri, Josephum Mariam Thomasium; accidisse velim nihil minus, quàm ut repente, sub ipsa initia Dignitatis amplissimæ, cum gravi mœrore bonorum omnium erepto e vivis, exequiarum justis indictis, pietatis officio supremo, parentaremus. In causa dolendi præcipua non privata modo, sed publica etiam, propter acerbissimam jacturam ejus, qui sublimi jam loco positus latius extenderet virtutem suam; lucemque morum suorum in totam rem Christianam Princeps Ecclesiæ disseminaret: levamen & nostrum est, quod esse solet lugentium sapienter damna similia; si putemus nihil adversi contigisse linquenti hæc humana, quæ semper contemnit; si decessisse libenter cogitemus migrantem ad immortalia, quæ unice optavit; si consiliorum, factorumque ejus recordatio alte inhæreat animis nostris; si vita cæpta sancte, & acta sancte, ita mentis oculis obversetur, ut, quem amisimus, amissi memoria perfruamur. Hac potissimum ratione, quæ semper visa op-

portunissima esse consulte dolentibus, quæ veram erga mortuos benevolentiam significare, vestra autoritate jussus ego tristitiam, qua communiter angimur, minuere præsentem, & solari in posterum etiam, video statim difficillimum illud instituenti laudationem, ut ornamenta exequar omnia, quæ incomparabilis viri fuere; aut, quæ aggrediar ex omnibus commemorare, horum dignitatem, gravitatemque dicendo exæquem. Sed neque recensebo omnia laudando; & quæ constitui recensere, sunt ejusmodi, ut pulcherrima videri debeant ipsa per se; & fateatur quilibet inusitata, qui excipiat narrata tantum. Sunt illa, Auditores, quæ pene postrema Cardinalis optimi vitam claufere: quorum, ut nos aliis testes esse possemus, non necessarium nobis esset audire ab aliis; fors ita tulit, ut præsentem nostris oculis videremus. Pronunciaverat Pontifex Summus nomina eorum, quos in Cardinalium loca vacua suffecisset, postquam expectatio ingens, ac diuturna fuerat, quosnam sufficeret. Vel claros pro Romana Ecclesia legationibus obitis pronuncia-verat, vel Regum maximorum gratia, & commendatione florentes, vel pervagata opinione doctrinæ raræ celebres, vel præstanti opera eximios almæ Curix impensa diu, omnes consensu omnium integritate singulari a Pontifice tanto Dignitatem tantam promeritos; Thomafium inter hos. Momento temporis nuncii advolant: eodem fere momento venit ad aures civitatis, recusare Thomafium. Audita res infolita continuo rapit frequentem multitudinem  
in



in partem illam Quirinalis, in qua domus recusantis, haud facile credituros, etiam si cernerent. Propius accipiunt, Thomassium perstare in negando; manere illi mentem immotam; frustra circumfederi; frustra tentari; quanti frustra; cadere irritum quemcunque laborem; proficere neminem; ne illum quidem proficere, qui Familiae ejus quondam Filius, tunc forte Hospes erat, Cardinalem Pignatellum; quantacunque polleret homo gravissimus sententiae vi, urgentem valide, & instantem obstanti fortius, operam perdere. Biduum firmissime restitit, praedicantibus omnibus constantiam ejus, qui, magnis hortatoribus assidue admotis, nihilque moventibus stabilem contra, refutantem vel deprecantem, passus se vinci non ante esset, quam Cardinalis Ferrarius denunciaret, velle Pontificem. Huic volenti paruit. O Thomassium, tunc ego mecum, o virtutem tuam, qui vicisti teipsum! In quo suspicimus alios, in eo excellere tibi facile fuit, ut delatum Honorem recusares: te miramur, in quo nihil solet esse difficile aliis, ut Dignitatem, praesertim talem, minime respuant. Eloquor eadem nunc: Thomassium, quandiu in voluntate suscepta perseveravit Honorem splendidissimum recusandi, fecisse, quod non valde sibi difficile esset; fecisse prorsus difficile sibi, ubi in Honorem illum flexit animum: qui & subierit, quod detrectabat; & cum subiisset, admiranda quadam virtute gesserit, affirmo Thomassium habendum multo maximum. Dubitamus?

Cum

Cum obliteret, ita Thomafius agebat ex proposito mentis antiquo, ita ex vitæ instituto inveterato, ita ex firmitate animi corroborata, ut prope in naturam aliam, si se dederet, verteretur. Dum a Thomasio Thomafius amovebatur, annos sexaginta quinque natus erat. Quem ætas tam longa non confirmat, ut, quæ studia puer amplexus dimisit postea nunquam; quæ jam tum amari cæpta magnopere, & diligentissime exerceri, tempus diuturnum, & usus assiduus intime infixit, malit semper hæc, nolit unquam, aut velit ægre dissimilia? Nondum puer hic, qui nulla posset adhuc ratione certa deliberare, quid sibi maxime expediret sequendum in vita; qui nullo adhuc discrimine rerum discernere, quarum sibi oporteret curam esse perpetuam, & anxiam; insitam tamen virtutem habuit, qua, consilii capiendi simul atque facultas esset, instabiles, & caducas nihili duceret; vim habuit inditam ab ortu primo, qua voluntatem suam ad sempiternas, & nunquam lapsuras inclinaret. Erat editus sanguine illo, cujus instinctus ferret omnes editos inde ad æterna concupiscenda, ad posthabenda præsentia futuris, bona minima collata cum his, quantumvis magna: procreatus erat majoribus illis, qui & nobilitate genus illustre, & pulcre factis præstabile nomen, & prævalidas familiæ opes, fulgentes etiam jure imperii a Summis Regibus concessio in populos, habita apprimè hominibus in pretio decora, ipsi tamen sic habuere, ut majora sedulo inquirerent, & avide meliora confectarentur; quidam etiam, quò  
con-

contenderent expeditius, ultro familiam; genus, potentiam abdicarent: parentes genuerant, qui genitum ita alerent, & educarent in claritatem; & divitias avitas, ut simul monerent, patrimonium opima non esse, quæ tradita aliquando acciperet; germanam gloriam non esse, in quam succresceret; esse hereditatem confertissimam, esse possessionem honoris incorruptam, quæ maneret alibi, quærenda enixe, si sciret, sola quærenda. Mater præsertim bonitatis matrona lectissimæ docebat hæc, sermone potentius docebat, moribus suis. In domo plenissima religionis, ad modestiam intus forisque composita, summis infimis ad ingenium familiæ probæ, ad normam absolutam matrifamilias conformatis; in penetralia, quæ sanctitatis interioris, & propriæ secreta sedes, quotidie dulcissima pignora ad se vocabat: parvulis materne affidens, arte mollissima teneros animos assuefaciebat divinis tantum amandis: ætate inde, ac mente firmiores premebat arctius: obortis lacrimis complexa orabat, nulla præoptarent, nulla iis, quæ nunquam essent interitura: obsecrabat; quæ a matre audirent, cum matre legere & meditarentur, hæc meminissent, quandiu viverent: subinde etiam inter ardentissima vota Deum adorantium simul, concorditerque precantium, ut propitius esset, qui posset unam bonam mentem injicere, injectamque constabilire; datis flagellis manus armabat, hortata verbis, hortata exemplo, ut bellum sibi indicerent, sibi que inferrent, superaturi facile obstantia quævis; si aspera tolerando didicissent non se diligere.

Tan-

Tanquam conspirantes contra mortalia , a desiderio , & a conspectu eorum abstulit subita fuga filios quinque , cum sex essent ; ipsam facti autorem matrem abstulit non multo post ; recta petentes munitissimas arces , prohibentes illa longissime , a quibus vellent se dissociatos , & seculos in perpetuum. Alii loca alia tenere tuta præsidio sanctitatis : Josephus , Caroli patruī vestigia secutus impressa recens , tenuit loca vestra , optimi Patres , providentiæ divinæ munere plane admirabili , & seculis ante omnibus inaudito , constituta iis , qui , abjecta solitudine terrenorum , sola celestia desiderarent. Fecere omnes animose ; Josephus in primis , Principatu domestico Lampedusæ , & Palmæ sibi intercluso , in quem genitus ante alios successurus esset. Summa rei Thomasiæ splendentis inter Siculos vergebat in illum : ille præ ceteris heres familiæ , ille gloriæ , caput ille sanguinis , spesque ille generis . Cum ornamenta cuncta ; bona , fortunæ , jura plurima , ac nitidissima gentis ad Josephum maxime deferrentur ; ne unquam obtineret , se subduxit.

Spernenti humana patuit campus : in patentem se conjecit . Qui multo ante secum statuerat , antiquitatem originis , majorum imagines , magnificos titulos , sonantia nomina , jactata vulgo , esse fumum excruciantem male sanos ; in despicientiam horum summe exarsit inter illos , a quibus & claritudo generis , & amplitudo familiæ mutata libenter esset cum arcta vita , & latente in sanctitate : qui pridem decreverat , facultates , possessiones , opulentiam ,

tiam, conquisita passim anxie, esse impedimenta, esse pondera in alta tendentibus; despuit contemptissima apud illos, quibus recepit Christus ipse, omnia possessuros, si nihil haberent; omnia habituros, si nihil peterent; omnia nihil habentibus, nihilque petentibus illo interim, qui recepit, bonitate ineffabili suppeditante. Cum omnia, quæcunque hinc audiret, quæcunque videret, invitamenta essent ad animi excelsitatem terrena cuncta prætereuntis; exemplum Caroli patrui incitabat præter cetera, ejus, qui familiarem Principatum deposuerat, quem ipse, dum sibi imponeretur, non tanti putaverat expectare, ut præeuntem sequeretur: jam assecutus dabat operam, ut mores, non sanguis, propinquos facerent; virtus elaborata, severitas in se eadem, necessitudo conjunctissima esset, non quam natura tribuisset. Servantissimus, ut ille fuerat, eorum omnium, quæ Sodalitatis religiosissimæ præciperet publica lex, impense custodita, ut custodiret ipse impensius, legem privatam sibi sanxerat: obedientiæ, abstinentiæ, patientiæ, quæ reliquorum exacta studia essent, addidit sua: mentem Deo summissam, charitatem illius ferventem, propter illum irrequietam charitatem aliorum, studiosius a se postulabat: definita tempora Deum orandi per preces, definita laudandi, definita satagendi, quæ Dei essent, & ad cultum ejus pertinerent, habuit ipse nulla: quamvis industria obtegeret, quidquid sancte, pieque privatim ageret; clam semper ageret & abscondite, omnium oculis & scientia evitata: constat

stat nihilominus, solitudines captare solitum, quibus sua occuleret, nocte intempesta, rebus divinis attentissime, & ardentissime meditandis, ante aras Templi suspirantem, lacrimantemque pervigilasse: constat, sectantem maxime quæque dura, cum minime videretur, paupertate, & egestate quadam recondita sese afflictaſſe; bellum irreconciliabile secum suscepisse, atque in susceptum sic instituisse, ut ne vires quidem lassitudine extrema attenuatæ pacem ullam inducerent. Se macerantem, conterentemque non videbamus: apparuere in corpore mortuo tantum insignitæ grandæſque notæ se contudentis, se lacerantis: at videbamus etiam in vivo, quæ indicarent, talia illum in se facere: macies in vultu quasi consumti; genæ pallidæ & exhaustæ; retruſi oculi & enecti; gressus languidi & membra trahentis; imbecilli artus & labentes, una animi virtute fulti. Voluiſſet extare neque hæc; qui ſuſpicari ubi poſſet, oſtendi ſe non de facie noſcentibus, aut ſe obtutibus peti ab obviis, pudibundus ſe colligebat, vitabundusque, quantum liceret, & fieri poſſet, a ſpectantium viſu deſlectebat: illam eſſe Thomasiſ obſcuritatem voluiſſet, ut, qui nullus haberi cuperet, nullus etiam haberetur. Sed tantus cum eſſet, & Romæ eſſet in urbe tanta, civitate perſpicaciſſima, quanti quiſque ſit, Thomasius deliteſceret? Ferebatur quacunque nomen vel invitati: percrebuerat ſermo paſſim, Thomasium exemplum eſſe ſanctimonix ſingularis ſeculo noſtro: magni Principes, magni Præſules, Viri magni frequenter adibant, ut, quod ille mini-

me

me intelligeret, perfectæ probitatis imaginem etiam oculis usurparent; ut, quod ille recusare minime posset, in maximis difficultatibus animi adjutore uterentur; consulerent peritissimum dirigendi iter aliorum, quod ipse jam pervenisset; rectorem, ducemque sumerent, strenue præterlapsum scopulos illos, ad quos paucorum esset non appellere, & appulsos non adhærescere.

In hac sanctitatis luce clarissima ut conpectior esset, lucem adjiciebat fama doctrinæ, quæ morum laudem excellenter illuminat; & bonitate amabiles solet efficere, ut amentur enixius. Nullum disciplinæ genus, in quo Thomasius non ita versatus, ut in illo uno versatus videretur: nulla antiqua, nulla recentia monumenta, quæ non solertissime ab illo pervolutata: paratus dubitantibus erat, paratus exagitantibus, quidquid scituri, scitive proponebant: inter doctissimos judex difficilium controversiarum; quarundam etiam idoneus judex Romæ solus. Sed quemadmodum vitæ, sic etiam eruditionis genere custos, & tenax propositi sui humana ubique fugitantis, delegit sapientiæ partem, in qua præcipue laboraret, nihil vanam, nihil fucatam, non inaniter absorbentem ingenia, non animos misere ludificantem; sed unam totius verissimam, fructuosissimamque delegit, partem Divinam: Ad caput ipsum, & fontem ipsum, a quo simplicissima veritas manat, & fructus uberrimus proficiscitur, Deum, naturam ejus, & opera cognoscenda sese contulit, Theologica subtilissima contem-

tente, acuteque speculatus: quæ in Dei cultum, ac præstantissimæ, & beneficentissimæ naturæ ejus reverentiam vetus, & hodierna Romana Ecclesia observaret, ritus, ceremonias, solemnia, indagata & inspecta perfectissime caluit: Patrum Latinorum; & Græcorum sententias de Deo, rebusque divinis, eorundem decreta, & effata de moribus Christiane regendis, temperandisque ad regulam divinitus promulgatam; collegit affatim; & naviter Latine, Græceque explicavit: libris etiam editis sacra literatura refertissimis, doctrinæ, & sanctitatis copia omnigena exuberantibus; & libris edendis aliis, Religioni Christianæ utilissimis, nisi instruente, & adornante mors occupasset.

Etiam hîc mire modestum cura non tetigit, solita tangere vel modestissimos, ut saltem nomen suum inscribant in libris suis. Quos emisit in lucem primum, horum autorem se celavit: circumferebantur, legebantur, laudabanturque, tanquam latifundia scientiæ arcana; corrivata in unum volumina Patrum, rivique exundantes haurire volentibus Catholica dogmata: sed tantæ rei compendium cui referendum esset acceptum, obscurum erat. Detectus Thomafius autor, inclaruit postmodum modestia alia. Sumserat interpretandum ΑΓΓΛΩΝ, celebre Opus gravissimi, sanctissimique Patris Epiphani: accuratissime interpretatus, protulit in adspectum. Difficultas ubique molesta transferendi scite Græca in linguam Latinam, molestior autem multo in illo Scriptore, propter vetustatis labes, & maculas ibi penitus insidentes,



tes, objecta passim impedita, salebroſa, mutila, hiantia, laſſatura conantem quemlibet, interitum, invictumque a labore: impulit in lapſus explanatorem magnum magnique nominis, candide jam profeſſum inter præruptiſſima haudquaquam ſe tutum a lapſibus. Menda viri doctiſſimi Thomafius vidit: ſuſtulit etiam; peritorum ſententia, recte ſuſtulit feliciterque: interea tamen emendantis vocem ſuppreſſit: nullam cenſoriam virgulam expedit: nullum regentis aberrantem, monentis verbum nullum: quietus, ac tacitus emendavit; paratus ne hiſcere quidem, niſi Epiphanius ipſe lectus novum interpretem ſuum, novumque ingenium ejus demonſtraſſet; niſi prudentes, catique judices Eru-ditorum magna de beneficio hoc, magna de moderatione generis hujus præconia feciſſent.

Exiſtimationis tantæ, quæ nihil eunti obviam, quin etiam averſanti, ultro tamen ſeſe offerebat, adeo nulla unquam dulcedo fuit, ſenſus adeo nullus, ut nunquam putaverit æquum haberi uſpiam rationem ſui; rejecerit ſemel, iterum, ac ſæpius habitam. Suis maluit ſubefſe ſemper, quàm unquam præeſſe: quidquid extolleret ſupra ceteros, ſemper repulit: a Summis Pontificibus accitus ad munia, quæ petere candidati plurimi ſolent, ſummiſſe re-ruit: Pontificia autoritate adactus ad quædam, obteſtatus eſt, ut ea condicione capeſſeret, ne ultra certum tempus honos ille ſibi prorogaretur. Munus fuit unum libenti aſſignatum, occęptumque libenter, quodd onus magis, quàm honor eſſet, ut negotia ageret pro-

curator Collegii ejus , a quo Catholica Fides propagatur. Provinciam hanc, successore nunquam dato , successore petito nunquam, Thomafius egregia animi alacritate adminiftravit ; qui probe norat , non finibus domus unius , non unius gentis limitibus circumfcriptam provinciam fe gerere , fed univerfi Chriftiani Orbis , Religionis univerfæ noſtræ , quocunque terrarum , & populorum hanc aliquando , Deo aspirante , perduendam ſperaretur , ſpatiis ac regione patentem , fe gerere , cùm illius Seminarium , ubi ex inclementi ac ſterili ſolo adveſtas plantas teneras , & miti ac feraci ſtatim inſitas , mira pietatis & ſtudiorum diligentia Roma educeret , & educas , jamque fructibus tempeſtivas remitteret , unde adveniant , fertiles Orthodoxæ Veritati inter populos caligine falſitatis circumfuſos ; rationes defenderet , & commoda conſervaret , curatione rei maximæ addiſta Eccleſiæ , nudum procuratoris nomen vindicante Thomafio ; qui , ſi nudo nomine levius quidpiam eſſet , hoc maluiſſet : ita in eo , quod velle cœperat , perdurabat , ut nihil unquam vellet extra ſeipſum , & animum ſuum , nunquam nutans , firmior in dies , quò in dies exercitior ad faciendâ nihili , quorum deſiderium torquet alios.

Audiebat interea allata ex longinquo , quæ ardentem hortando incenderent : macte virtute eſto , o ſanguis meus : macte animi vir , o ſanguis noſter : pluſquam viriles Matris , ac Sororum ſpiritus excipiebat ; quæ rebus hiſce inconstantibus , & perituris qua fortitudine

ter-

terga dederant , nactæ majores a fuga vires ;  
 cursu citatissimo eò jam devenerant , ut vox  
 una omnium ingentes illarum animos , & ad-  
 mirabiles celebraret . Mater primario loco na-  
 ta ex Trainensium propagine Panormi inclý-  
 ta , amisso patre , cura patrui Episcopi Agri-  
 gentini , neptis unica , familiæ superstes una ,  
 sancte adoleverat : nuptias , opibus coacerva-  
 tis in unam beatas , diu refugit : domus , in  
 quam nupsit , illa traxit : ast consilio avulsa  
 nunquam , virum jam liberorum multorum  
 patrem rogaverat , liceret abire : ne amplius  
 rediret , tenacibus vinculis religionis se Deo ad-  
 strinxerat : omnium oblita , obliviscenda omni-  
 bus , in vita rigida , squalore obsita , vita ;  
 quæ mortis instar , amat exinde nuncupari Se-  
 pulta . Amantissimæ , carissimæque sorores Cru-  
 cifixæ , & Lanceatæ , assumpta doloris nomina ,  
 ut in Christo dolente viverent , sibi suisque  
 emortuæ , cœlestes animæ , adsunt illi : tu Cru-  
 cifixæ , suavissima soror , edita cœlo , divina  
 virtus , tu Crucifixæ , fratris dulcissimus amor ,  
 ades hærenti pectore toto , ita hærenti mente  
 tota , ut una Crucifixæ cogitata omnem rerum  
 omnium mortalium memoriam expun-  
 gat , ac deleat .

Huic nos homini difficile fuisse credamus ;  
 huic abstinere Honore delato ; advenienti re-  
 pugnare , ut abstineret ? Admittere , & attin-  
 gere difficile fuit Honorem , nulla mora ab-  
 trahentem a voluntate validissima viribus ,  
 trajicientemque subito in dissimillimam , &  
 pristinæ oppositam . Qui acceperit , ut danti

obtemperaret ; qui potenter , ut acciperet ; sibi imperarit , ajo hunc tetendisse per ardua , nixumque per aspera . Certantis , ac desudantis ; laboris , & æstus , dum pervaderet ; illa quæ vidimus , signa fuere : Studium autem nostrum videndi , & pervidendi quis reprehendat ? Ibi peregrinantes , nihil fere fuit in operibus manufactis , nulla tabula , nullum simulacrum , nulla supellex , quam non viseremus , si vel arte paulo elegantius , vel materia diceretur æstimabile aliquid : marmora ipsa semesa , fragmina , ac rudera ipsa , quæ illius quondam florentissimæ urbis reliquiæ aliquæ essent , visuri , publicas ac privatas domos , custodita & incustodita loca peragrabamus : per plana , per colles , saxeta , dumos , pervia , impervia venantium more conquirebamus : an non multo intentiores essemus ad penitus cognoscenda pulcra virtutis opera , quæ reversi in patriam , reflagitante , perspecte cognita narraremus ?

Jussus fuerat in diem tertium accedere ad Summum Pontificem , ut Insignia Dignitatis reportaret . Eo die bene mane ad Vaticani radices constiteramus , rem totam conspecturi , ut gereretur . Ad horam indictam curru injectus aderat , turba generis omnis , ut in re latissima , admurmurante ; ut in civitate officiosissima , undequaque ad cultum ejus circumfluente . Ex illa solitudine , vitæque recessu , quod pridem sese abdiderat , Thomasiu mente repete : quæ nunquam voluisset , semper defugisset , populo frequentissimo versantem in illis : audientem , videntemque , qualis & quantus dice-

diceretur , & crederetur ab omnibus , qui semper fuisset , essetque adhuc contemtor sui ex animo : sentientem , perspicientemque oculis suis , quàm jucundam , quàm memorabilem putarent omnes illuxisse sibi diem illam , quæ Thomassium sponte latitantem , volentemque latere semper , Urbi , ac gentibus omnibus Cardinalem ostentaret . Exiensus in terram fuit is , ut congressum cum valde repugnantibus , luctantemque cum ardue vincendis , non dubie nosceres . Atria Vaticana scandeat meditabundus & conturbatus , ut qui consurgit in acerbâ . Ventum ubi ad limen ; medius inter Cardinales , qui destinati novum adducerent in conspectum , ornandumque exhiberent , ibat per Purpuratos Proceres , tacite gratulantes advenienti ; ibat vultu eodem , animo eodem , perplexo ac suspensio . Ad Summi Pontificis solium adstat . Qui Majestatem illam densi circumstant , consensurum certatim adjuvant ; omnes attollunt ; & admovent expectanti . Hic tum Supremi Patris frontem explicatissimam , hilaritatem ejus toto ex ore emicantem , benevolentiam ex corde ejus intimo sese effundentem in Cardinalem suum , bonitate consummata vitæ carum , sapientia bonitatem vitæ æquante carum , prudentia rerum in magnis experta carum ; cum gaudente Pontifice , quis gaudia referat omnium , quotquot rei huic interessant infiniti , Ecclesiarum principis flos Ecclesiæ , civitatis nobilissimæ flos universus , advenæ innumerabiles , quos per ea tempora non ex Italia modo , sed etiam Europæ partibus disitis .

exciverat celebratissimum Romæ Festum , Quatuor , qui vitam cœlitum duxissent in terris , in cœlitum numero reponendis die post illam ? In uno illo , cujus causa tam communiter , tam insigniter , tam vere gaudebatur ab omnibus , in illo uno lætitiæ notam nullam , nullam , quæ saltem ambigua lætitiæ nota esset , videbamus : at sane videbamus multa revolventem , loquentem multa secum , & multa secum illacrimantem , cùm Pontifex sacrum Galerum Rubrum traderet ; diceretque voce gravissima , quid traditus ille moneret . Redeuntem ita ornatum necesse erat Cardinalium singulorum petere amplexus , & singulis dare : amantissime fecit cum amantissimis : inde necesse erat gratiam singulis profiteri : nequem præteriret , vestibulum cepit , quæ exituri erant ordinate : professus impenſe est : intercisa subinde verba & interrupta ; magis quàm verba , dolor erumpens .

At secum ita pugnans , ut tamen neque hîc , neque uspiam pugnaret homo sanctissimus cùm voluntate divina : qui sententiam quondam interrogatus a recusante Dignitatem Maximam , doctissime , gravissimeque scripto libello responderat ; quoddam manifestus , tamque notabilis esset ibi nutus , jussuque Dei , quo afflante , tam concordēs , tam constantes , tam muneri , & ponderi parem eligerent sapientissimi , prudentissimique suffragatores , resistendum non esse : ipse nunc Cardinalis , quia ita visum Ecclesiæ , & ita lubitum ; aggredi fortiter , & agere continuo cœpit illud , ut , cui pervicerat uni , impiger obsidendo , & oppugnando acer , animum

num suum , etiam illi uni Cardinalis esset ,  
 nunquam sibi ; victoriæ ejus fructum omnem  
 Ecclesia perciperet , nullum ipse decerperet ; ca-  
 veret imo , vehementerque caveret , ne ad se ul-  
 lus unquam perveniret . Ne perveniret , igno-  
 tam quandam virtutem exeruit . Quantacunque  
 sibi lux oboriretur e re tanta , quæ certe obori-  
 tur maxima omnibus , totam reflexit in Eccle-  
 siam , nunquam ipse oblectatus splendore tan-  
 to : divitias quasunque illa tribueret , vel pa-  
 teretur advocari ex olim relictis , fulcimenta Di-  
 gnitatis , refudit in eandem , inter copias quas-  
 cunque inops : quos illa custodes , assecclas , sti-  
 patoresque circundaret , ornamenta Honoris ve-  
 nerandi , laboravit ut augustiorem Honorem ,  
 non hominem facerent , comitatu circumstente ,  
 solum nihilominus : in domo , quam expo-  
 laret supellex jussa , domum Cardinalis inhabi-  
 tantis , ne ibi quidem dominus fuit rerum ulla-  
 rum ; hospes fuit , nisi si etiam minus quam  
 hospes , cui nihil , ne tandiu quidem dum ibi  
 esset , renideret : & animum , & studia , & vi-  
 res dedit illi . Nulla igitur contentione , soli-  
 citudine nulla , non labore , non vigiliis deesse  
 unquam ; vacare nunquam , cessare nunquam ,  
 nunquam quiescere pro negotiis Ecclesiæ , quæ  
 Cardinalem Thomassium postularent . Adibant  
 facile omnes , audiebantur benigne omnes , qui-  
 bus opus esset convento illo : pro amplitudine  
 Dignitatis cuncta ubique publice , privateque :  
 Jam senuerat ; cum creatus Cardinalis : senio  
 valetudo accedebat infirma , & prope fracta :  
 Ratio titubantis salutis nulla , timores nulli ne

hæc laberetur in deterius, non morbi ipsi, ne ille quidem, qui vitam abstulit, a fungendis, quæ Cardinalis essent, absterruere. Fuerat illi attributus Equitii Titulus: omnia implere studuit, quæ ille posceret: navabat sedulam operam in Templo suo, contigua domo conductâ, ut promptior esset: sacris faciendis præsens erat: Sacramentorum minister ipse: ceterorum permixtus choro preces diurnas nocturnasque canebat: Christianæ scientiæ rudes ipse erudiebat patientia mira: omnibus opportunus, facilis omnibus: ne vivam si scio, causatum unquam aliquid aut non itasse, aut isse cunctanter, quò profuturus aliis adveniret; si aut quietem ullam animo fatigato, aut corpori laxamentum ullum dedisse, scio.

Divisus in omnia, proque Ecclesia disterrissimus, nihil ut videretur potuisse sibi temporis reservare; solertia tamen laudanda mirifice, exemplo & occupatissimis, & non occupatissimis imitabili, reservavit & sumsit. Dies nulla præteribat, cujus partem rebus sanctis contemplandis, sanctisque scribendis non tribueret: remotis arbitris quotidie legebat, & percurrerebatur æterna: congregatam quotidie familiam hortabatur ad curam sanctitatis eandem; graviter admonebat illius, cui servitutem quicumque fervirent, hi demum omnium optima condicione servi essent: suavorum exaudiendus, qui faceret, quæ suaderet; facientem domestici cernerent, testes etiam latentium alios. Intra tecta illa nihil erat, quod esset curantis aliquid mortalia hæc, nihil quod  
non



non esset omnino aspernantis : tenuissimum , & parabile pretio minimo , quidquid intus : non parietes tegebant peripetasmata , non peristromatis erant strata ulla : nusquam oculorum illecebræ : nuda fere omnia ; munditia casta pretiosius fere nihil : sed ubique occurrebant , quæ Christianæ pietatis desiderium incuterent ; quæ contuentem meliorem facerent . Inde procul argenteis , procul auratis omnibus eliminatis , in mensa frugalissima vasa terrea , vasa lignea , ut plurimum panis , aqua , legumina tantum : in vestibus serica quævis , aut ex vellere peregrino ; molliusve contexta artificio , sibi suisque interdixerat . Prodeuntis erat habitus idem : quo etiam conabatur efficere , ut in fama , & gloria commonstrante omnibus , tamen ignotissimus omnibus superveniret . Occultabat , quoad poterat , ipse se : occultabat ex composito familia sua , comta nihil in elegantiam , nihil exulta in morem , quæ nobilior : quæ humilior , plerique pauperculi , squalore absterfo puri ; multi ex falsa religione abjurata , non tam famuli , quam longum agmen alendorum , comitabantur incedentem apparatu parvo & modico ; omnibus circa illum vulgaribus , omnibus obsoletis , tanquam moribundum , jamque morientem .

A morte nimirum parum aberat : jam tum præfenserat se abesse parum , cum Dignitatem iniret . Divino spiritu instinctus , ventura edoctus inde , obitum suum clam palam sine ambagibus prænunciabat . Cardinali Fabrono familiariter colloquenti cum diceret , se accin-

gi ad iter; percontanti, quorsum? digito lætabundus cælum ostendit. In subterranea Templi sui cum descendisset, ducentem interrogavit, ecquantum in angulo illo caliginoso esset effodienti humus alta? tres palmos, ubi audivit; satis, inquit, gaudio gestiens, satis mihi: præbebit sepulcrum mihi effossa quamprimum. Afferenti, exiguam superesse pecuniam in usum familiæ quotidianum, tranquillus dixit, ne laboraret, si exigua illa tamen sufficeret in dies octo. Transierant nondum dies octo, cum & labores vitæ perpetui, & exantlati postremi intensius, & austerius semper, multo autem per tempus Christi Domini Adventu sacrum austeriora jejunia enervem, languentemque stravere. Ingruente morbi vi, non sustinenda infirmis viribus illis, stratus licet, & exanimus, tamen non sese abiecit. Noctem venerabilem mysterio Christi Nascentis, totam, hyeme crudescente, transiegit insomnis: solemnibus coram Pontifice voluit interesse exanguis spiritu extremo; die sequenti ritu Ecclesiæ ter litare jam emoriens: decumbens dies reliquos, & fatiscens inter mortis angores, prima die ineuntis anni, qua die quondam Carolus patruus, perfunctus vita simili, dicata die Martyri Almachio, cujus in tutela Thomasi omnes; extinctus est, reviviscens, ac reflorescens in annos æternos.

Scripserunt, qui solent verissima scribere, mortem ejus fuisse auditam, quam potuit unquam tristissimo animo, aut potest mors audiri cujusquam optimi: ex urbe tota concur-

cur-

currisse lamentantes : pene elatum manibus  
conquerentium : sepulturam ejus vultu mæsto,  
ac lugubri populum celebrasse : temperatum  
nullis eorum , quæ in hominum sanctissimo-  
rum morte usitata religio est : libata oscula  
pheretro , pressa vestibus , pedibus ingeminata  
jacentis : Cardinales , Principes , Legatos , Pri-  
mores , ut in vivum , sic in mortuum pieta-  
te certasse : quod aut fuisset unquam viventis ,  
aut mortuum contigisset utcunque , secum qui  
inde ferret , minutulum etiam , tulisse ut quod  
sibi esset commutabile cum re pretiosissima  
nulla . Mortem subsecuta miranda : perniciem  
non unam insanabilem , implorata ope ejus ,  
repente sanatam & in urbe , & extra urbem :  
sincere veneratos imaginem ejus , doloribus ob-  
stinatissimis fuisse solutos illico : nomine ejus  
invocato , desisse torqueri male diu vexatos  
ab humani generis hoste , dira & execranda vo-  
mente in expulsores . Hæc & alia testata esse :  
maturo sacrosanctæ Ecclesiæ judicio obnoxia . \* Loquor se-  
cund. Decr.  
URB.VIII.  
Sciscitantibus de illo , quod in mortuos statim  
inquiritur , non leve momentum famæ in par-  
tem utranque , testamentum quale conscrip-  
serit , respondent : fecisse neminem heredem  
pecuniæ , quam reliquerit , quanta vix diem  
unum parva domus , frugi , ac sobria victita-  
ret : hanc quantulamcunque ex testamento  
crevisse pauperes eosdem illos , qui heredes  
ejus non ex parte dimidia , aut tertia , sed ex  
asse fuissent defuncti nondum : legasse totam  
supellectilem , curtam licet , nihilque lau-  
tam , Collegio illi , cujus utilitatibus procu-  
rator

rator inferuisset, benevolentissimum post mortem etiam : illis legasse, quos amicissimos omnium semper habuisset, & tunc haberet, supra consanguineos omnes, & affines qui optati & dulces essent, vobis, spectatissimi Patres, nihil præter sanctitatem, & doctrinam appetentibus, legasse scrinia sanctitatis, & doctrinæ suæ, Libros : legasse etiam prudentissime de re non sua, qui pro certo crederet, uti ipse legasset de re non sua, ita jus fore apud Thomasio : Ferdinando Palmæ Principi pronepoti, liberali & pio, familiam legasse suam iuvandam auxilio : egisse, ut ex Sicilia ferret opem spoliata præsidio; subsidia miseros solatura domo submitteret. Testem locupletissimum Protonotarium Apostolicum Collicolam dicere : cum seriem hanc rerum Summo Pontifici ipse exponeret volenti singula audire; isse eum in lacrimas, isse fusa intuentem allatum monumentum sepulcrale, quod ille curarat ponendum sibi. Lapis quidam erat nec bipalmis : inscriptio erat : *Josephus Maria Presbyter Cardinalis Tituli Equitii*. Thomasi filem; stirpem filem; sua seque filem, qui famam, nomen; memoriam sui omnem tumulo eodem sepultam vellet, secumque obrutam : una loquitur, quæ sunt Ecclesiæ, ne abnuat mortuus, quod ne vivus abnueret, fecerat, jubente Ecclesia, virtute tanta.

Sed famæ immortalis, nominis, ac memoriæ in posteritatem temporum omnium perpetuandæ, Thomasi Cardinalis; laude probitatis, dignitate doctrinæ, ornamentis animi  
omni-

omnibus, ingenii omnibus victure semper: quæ siluisti tute de te, nunquam filebit Ecclesia; locuta fastis, locuta monumentis, linguis locuta æternum, æterna, & in æternitatem condita, Rerum interim tuarum conquisitionem diligentissimam diligentissimis demandavit, ubi, & quo tempore feceris, quas semper, & ubique fecisti magnas: quæ superesse potuerunt in tanto bonorum amore habendi tuum aliquid, horum custodiam arctissimam imperavit: ut residua honore dignissima, conclusit, & sigillis Apostolicis obsignavit: resignabit, & recludet, ubi statuet de te rite, illo inspirante, cujus est gloria, gloria suorum. Ore illo, quo Veritas immutabilis, certissima, ac sempiterna Deus Optimus Maximus enunciat suæ Ecclesiæ, Pontifex Summus te laudavit, te exultit, ut vere ingentem sanctitate: palam te sanctum appellavit: te in Cætu Cardinalium maximorum, & integerrimorum omnium protulit exemplum imitandum; visus Christianorum ille Pater, Gubernatorque supremus, cum eorum quolibet comparandus, quos & sanctissimos, & sapientissimos fuisse unquam Pontifices, ac floruisse legimus, visus inter res non Pontificatus modo sui, sed etiam præcipue memorabiles Ecclesiæ cujuscvis ætatis, credere, & habere Cardinalem Thomasiū.

Atque hinc non reticebo, Princeps Eminentissime, Georgi Corneli Cardinalis præstantissime, non reticebo Thomasi Cardinalis studium in te singulare, benevolentiam in te eximiam. Munitus nomine tuo pergebam Romæ faci-

facile, quocunque vellem: nihil-obstitit mihi  
 volenti pergere vel in difficilia, & inaccessa.  
 In illo motu rerum per valde confertos pene-  
 travi auspiciis tuis ad Cardinalem Thomasi-  
 um, Dignitatem recentem gratulaturus verbis iis,  
 quibus conjectura augurabar absentem te ju-  
 bere. Statim ut ille audivit, esse me unum  
 Seminarii tui; & pro Cardinali Cornelio fa-  
 cere secum officiose: oh superi boni, quàm  
 grata, quàm ampla, quàm exaggerata volun-  
 tate fuit ibi in te: quàm ille splendide de or-  
 namentis maximis tuis, quàm de maxima vir-  
 tute tua ille magnifice: quàm dabat operam,  
 ut animum erga te suum tenerem ego, scirem  
 possemque ad te perferre! Optimus Optimum  
 diligebat. Ex illis beatissimis sedibus te nunc  
 præsertim diligit, bene de se meritum isto do-  
 lore tuo, funus honestantem suum præsentia  
 tua. Quamvis tu nullam gratiam exigas, re-  
 cte factis tuis contentus unice; tamen inde,  
 unde prospectat, in felicitate perenni, in vera  
 felicitate collocatus, pro humanitatis, pro  
 amoris officio tibi gratiam habet. Et vobis ha-  
 bet, viri Nobilissimi, & Literatissimi, ex fre-  
 quentia, qua convenistis plurima, ex dignita-  
 te, quæ magna est omnium, magna singulo-  
 rum, aucto sibi parentalium honore: mæstis  
 causa sua; ferentibus mortem suam, ut qui æ-  
 gerrime ferunt & acerbissime ubique gentium;  
 tantam gratiam habet, quanta a tali potest  
 de se pie meritis provenire.

